



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 8


**Israel-i Gaza lenmang nung mitkar
inyakyim anena atatsü sangdong**

**Andy Murray Olympics atema British
team nung züngoksemogo**



VOL. XXI ISSUE NO. 245 (ADOK 245) DIMAPUR TENTONÜ (MONDAY) AAMI (JUNE) 17, 2024 ₹ 5.00

Taoba Minister M.C Konyak alima nungi pilaogo



Mr. M.C. Konyak

Dimapur, June 16, 2024 (TYO): Nagaland nung yimtenren lennir tejen aser taoba Forest and Environment Minister M.C. Konyak alima nungi pilaogo.

Pa mapang tatsüka shiranga arur June 16, 2024 anepdang Eden Hospital, Dimapur nung asü. Pa arishi küm 73 liasü.

Pa den asüpila sentong ka tanü Aoyimti nung agiogo aser iba sülen Wakching, Mon nung mang aremtsü atema bener ogo.

Nagaland Chief Minister Neiphiu Rio-i M.C. Konyak asüba osang angashia aoksaba metetdaksüogo.

"Naga nunger tanüker ka süogo. Pa ya kü den külemi inyaksemer ka dang masü saka medemer tajung liasü. Pa ya kanga dang tenendak, merangba inyakba aser tangar asoshi bilemtsüba nisungka liasü" ta CM Rio-i ashi.

MC Konyak-i teti telongjem atema jembia inyaka aru aser pai nübortem asoshi anibelem arema inyakogo, ta pai ashi.

"Pa asüba atema temulung raksar. Eastern Nagaland nunger Naga nunger tanüker tajung ka samaogo. Pai nübortem aser state asoshi inyakba mapatem teti bilemtetsü" ta CM Rio-isa ashi.

"Iba asükhu mapang ozü

Manipur Governor-i Amit Shah den ajurutep

New Delhi, June 16, 2024 (Agencies): June 16, 2024 nü Manipur Governor Anusuiya Uikey-i Union Home Minister Amit Shah den ajurutepa Manipur tensa osang lemsatepogo.

Centre-i Manipur nung tatalokbatem osang asüngdangba mapang ka nung tanü Ministry of Home Affairs nung Governor Uikey aser Amit Shah senden amen.

Tenati senden nung kechisa jembitep iba indang osang ano memetdaksüi lir saka osang angazükba agi yimjung bener arutsü aser tensa süngjemtsü atema tebilembatem lemsatep.

Amit Shah menden ser ano tanga senden ka amendang Jammu and Kashmir indang

kibongia asür kinungertem den mangyim lemsateper aser Tulusang Tsüngremi tesünap agüjang ta sarasademtsür. Asür tanüla teti atema anisüngzük ngudakjanga" ta Rio-isa ashi.

Deputy Chief Minister Yanthungo Patton-ia MC Konyak atema temulung raksaba metetdaksüogo.

"Küm aika pa den külemi inyaksema aruogo aser pai state tejakleni aotsü atema bendanga agütsüba aser tenangzükba agia inyakba nguogo. Pai Nagaland atema inyakba mapatem teti bilemtetsü. Par kibong aser kinungertem den asükhu lemsateper. Pa tanüla teti atema anisüngzük ngudakjanga" ta Y Patton-i metetdaksü.

MC Konyak ya February 1, 1951 nü aso aser Kohima Arts College nungi graduate ser 1972 küm nungi Social Welfare Department nung LDA ama inyak.

1992 nungi 1997 tashi pai Industries and Commerce nung Deputy Manager inyak. Iba sülen pai politics nung tetsüng ajemok aser 2003 küm Bharatiya Janata Party (BJP) candidate ka ama Wakching Assembly Constituency nungi takok angu.

Pai Irrigation and Flood Control atema Parliamentary Secretary aser iba sülen 2008 nunga BJP candidate ka ama takok ngur Forest, Environment, Ecological and Wildlife Minister inyakka liasü.

MC Konyak-isa 2013 küm Naga People's Front (NPF) aser 2018 nung Nationalist Democratic Progressive Party (NDPP) ticket tem amer toktep saka election anaprong nung tamakok angu.

tensa indang jembio.

Iba senden nung National Security Advisor Ajit Doval, Lieutenant Governor Manoj Sinha aser Chiefs of Defence Staff den tongti ketdangsürtem aden. Senden nung Jammu division nung Area Domination Plan aser Zero Terror Plan ajanga takok angubatam lemsatep.

Centre-i kiralongrartem anema mapa inyaktsü anungji security agencies-i mission mode nung mapa inyaka aotsüla ta Amit Shah-i tetuyuba agütsü.

Prime Minister Narendra Modi lenisüba kübok kiralongraba tsütsü 'zero-tolerance policy' inyaker ta paisa nenshia metetdaksü.

Nagaland Lok Sabha MP-i PAC senden nung madentsü

Kohima, June 16, 2024 (TYO): PAC-Nagaland Pradesh Congress Committee (NPCC) aser All India Congress Committee (AICC) nungi temelaba magii Nagaland nungi Lok Sabha MP S Supongmeren Jamir-i Political Affairs Committee (PAC) senden nung madentsü.

Congress Bhavan nung NPCC Political Affairs Committee senden ka amendang iba lemtet agia liasü.

Iba senden ya NPCC President aser MP S Supongmeren Jamir Supongmeren shimokba atema state sorkar dang pelaba metetdaksü.

State sorkari Naga yimten tebilemtsü atema tesüiba nung luden aika tenteta tentetogo saka mapa kecha balaka inyaktetba mali ta Congress party-i ashi.

Iba jagi PAC-NPCC aser AICC nungi temelaba kecha melii

MP Supongmeren-i PAC senden kecha nunga madentsü ta Congress-isa metetdaksü.

Nagaland sorkari tan ita tetenzüklen Naga yimten tebilemtsü atema PAC tenteta liasü.

PAC nung Chief Minister Neiphiu Rio Convenor, Power & Parliamentary Affairs Minister KG Kenye-i Member Secretary aser züngsem Rajya Sabha o Lok Sabha MP tem dena züngsem 26 shimok.

June 18-19 anogotem Nagaland nung tzünglu kanga arutsü

Dimapur, June 16, 2024 (TYO): June 18 aser 19 anogotem Nagaland nung tzünglu kanga arutsüba osang metetdaksüogo.

Uttar Pradesh nungi east Meghalaya tsütsü mopung talem aonba tang northwest Bihar

nungi east Assam tsütsü aoner. Iba ajanga June 18 aser 19 anogotem Nagaland nung tzünglu kanga arutsü ta IMD-i ashi.

June 18 nü Kohima, Peren, Phek, Kiphire, Tuensang, Wokha, Mokokchung, Mon

asur Dimapur kübok tesemtem nung tzünglu kanga arutsü.

Maneni, June 19 nü Kohima, Phek, Kiphire, Tuensang, Wokha, Mokokchung aser Zunheboto nung arutsü ta IMD-isa metetdaksü.

Manipur nung Naga teloktemi Myanmar nunger yoktsü mepir

Imphal, June 16, 2024 (Agencies): Manipur nung Naga nunger loktitentet balalai Union Home Minister Amit Shah dang Myanmar nunger parnok linüki meyipa yoktsü atema memorandum ka agütsüogo.

Parnokisa Indo-Myanmar arrtsülen aser Manipur kübok Kamjong tesemtem nungi Assam Rifles agientsü shiogo.

United Naga Council (UNC), Naga Women's Union (NWU), All Naga Students Association Manipur (ANSAM) aser Naga People's Movement for Human Rights (NPM-HR) teloktem külemi Amit Shah nem memorandum agütsü.

Myanmar nungi ozüng alema arur nisung 5,457 tashi Kamjong district kübok Tangkhul yimtsüng 8 nung jenokdakja lir aser yimdaklirtem dang nungibo

bendangertem teimba kümogo ta parnoki shidi nung shia lir.

"Nisung 5173 indang biometric agiogo saka tebur taintem mita reprangtsü kanga tasak kümogo. Ketdangpurtemi refugee camps nung parnok jungjunga mereprangteter kechiyong anüngdang aser aonung parnok nübo balala akümer. Ano lanurtem aser taintem taittsü aketba mapa inyakba ajanga onok asoshi lendong bentsür arutsü ana nung lir" ta Naga teloktemi ashi.

"Onoki kidanger tajung ka ama mulungsoa parnok jenokdaksüogo aser state sorkaria parnok teinyaktsü inyakogo. Anungji parnok par linüki meyipa yoktsü atema lenmangtem bushitsüla. Onoki parnok timtem asoshi bilemtsür saka par linük nung tensa

süngjema kümerji parnok timi kidangi aotsü atema lenmang bushitsüla" ta parnokisa Home Minister Amit Shah dang ashi.

Indo-Myanmar arrtsülen alirtem timtem jenti ajurua arur aser 1997 küm Indo-Naga Ceasefire agreement agitepaka arrtsülen mapa lemsükba sepaitemi tashiyim amshia arur ta Naga teloktemisa ashi.

Talisa sepai subotsü agir nisungtem senzüba ajanga yimdaklirtem tsübuteper aser külen Myanmar nungi nisungtem aruba manener, ta parnokisa ashi.

Maneni, sepai gari tulutem senzüba ajanga nübortem tetsükdaksü ajurur. Anungji lendong maliba tesemtem nungi Assam Rifles agientsü ayongzükler ta Naga teloktemisa metetdaksüogo.

Assam secretariat mezüngbuba green state headquarters kümogo

Guwahati, June 16, 2024 (Agencies): Deobarnü Assam Secretariat nung 2.5 MW solar power project ka lapokba sülen India nung mezüngbuba green state government headquarters kümogo.

Assam Secretariat nung grid-connected rooftop solar power plant ya Rs 12.5 crore endoka yanglu aser iba ajanga ita shia sorkar electricity bills nung Rs 30 lakh shi kümzüksü imlar.

"Tanü asenoki Net-Zero Government ka akümtsü atema mera tulu ka agiogo. Ni Janata Bhawan nung 2.5 MW Solar Project ka lapoktsüogo. Iba ya

India nung mezüngbuba Green Secretariat lir" ta Chief Minister Himanta Biswa Sarma-i ashi.

Tang nungi secretariat complex ajunga nung solar power amshitsü, ta pai ashi.

Chief Minister Sarma-isa official complexes ajak nung green initiative mapa inyaktsü sentong aliba lemsatep.

Assam nung tamasa medical colleges aser universities nung green initiative mapa tenzüksü, ta pai ashi.

"Home, Finance aser CM secretariat amala essential departments dak alaka sorkar office ajak nung aonung 8-9

tsüngda automatic disconnection facilities lia solar panels enoktsü" ta CM Sarma-i ashi.

Maneni taküm July ita nungi sorkari minister tem, tongti ketdangsürtem aser official quarters nung aliba staff asoshi electricity bills magütsütsü. Küm 75 tashi inyaka aruba mapa ya anentsüla. Onok bills onok sasa menoktsü" ta pai ashi.

Item mapa inyakba ajanga sen aser power kümzüksü aser Assam Power Distribution Company Ltd (APDCL)-i April 1, 2025 nungi power tariff Rs 1 ajemtsü atema lenmang bushiteptsü, ta CM Sarma-i ashi.

Peren nung food packaging indang training agütsü



Peren nung June 14-15, 2024 anogotem food packaging training agiba nung shilem agirtem kulüzüng kaket amer tangokba noksa ka yangi angur.

Dimapur, Aami/June 16 (TYO): Peren nung "Packaging for export of food, Handloom & Handicraft Products of Nagaland" indang training sentong ka June 14 & 15, 2024 anogotem ayongzüka agia liasü.

Iba sentong ya District Administration, Indian Institute of Packaging aser ATMA Peren district lungjemer ayongzüka liasü.

Iba training tembangba sentong nung C. Dory Yanthan menden liasü aser state nung iba ama aiben mongudangba sentong ayongzüka atema Deputy Commissioner, Peren dang pelaba lemsatepa liasü.

Iba sentong nung ATMA nungi Sheela Gangmei, Calvin Zeliang, Athuana aser

Lipokjungla Ozukum nungeri training nung angazükbatem lemsatepa liasü.

Shisalen sayur Dr. Asitava Sur, Guest Faculty of IIP, Kolkata ajanga jembidang shilem agirtemi tangatetba tajung nung shilem agiba atema pelaba lemsatep aser tetoktepba agi sünger aliba lima nung dangar den kasa tokteptsü asoshi 'standardized packing system' amshitsü ayongzüka liasü.

Paia akokba lenmang nung yariteptsü mulunga lir ta ashi.

Deputy Commissioner, Peren, Vineet Kumar, IAS ajanga iba sentong nung o tatsüka jembidang, shilem agirtem dang entrepreneurship nung temulung agütsütsü ajungmeso aser Peren district

resources aika lir aser danga tesem balalai itemji yoktsü koka lir ta ashi.

Paisa shilem agirtem dang company tajungtem den sendakteptsütsü aser paia akokba lenmang nung yariteptsü ashi.

Paisa shilem agirtem nem kulüzüng kaket agüja liasü.

Tonikali Achumi DPD ATMA ajanga iba sentong ayongzüker dang pelaba lemsatep aser Peren district kübok meta balala nungi tejangraba tulu nung arua training agirtem danga pelaba shia liasü.

Iba training sentong tenzükdang ATMA Cell, Kohima nungia arua shilem agiba atema lai pelaba lemsatepa liasü.

Nagaland Angh-i Eid-ul-Zuha salem lemsatep

Dimapur, Aami/June 16 (TYO): Ajak dangi Eid-ul-Zuha benjong salem abener. Iba temoatsü anogo nung bendanga agütsüba tanüla ajanga nenok ajak Allah anasai anir aotsü aser ner takum tesunep aser tepela agi asüngtsü moatsür. Ner sarasadem langzüksü aser nei bendanga agütsüba agizüksü sarasademtsür, ta Nagaland Angh, La Ganesan ajanga sangdong ka nung ashi.

Iba maongka agia asenoki asen maketa alitem den temeim

aser ariabilemba lemsatepti. Asenok kinunger aser tembartem den ajurutepa pelatepdang asen mulungjang aser asen ki tepela agi asüngtsü imlaa liti aser nüngdakba pur bilemteta nü temoatsütem temeim agi lemsateptsü bilemtetti, ta pai ayongzüük.

Iba Eid ajanga na aser ner kinungertem dak yimchiyimjung, anema aliba aser tatem maka temoatsü lidakjangma. Tepela Eid salem nübur ajak dangi abener, ta Nagaland Angh-isa ashi.

Longleng nung shi müreka amshitsü tesayuba agütsü

Dimapur, Aami/June 16 (TYO): Department of Animal Husbandry & Veterinary Services, Longleng ajanga Medical Department aser Longleng Town Council den lungjemer June 14, 2024 nü DPDB Hall, Longleng nung 'Clean Meat Production and Meat Borne Diseases' indang tesayuba agütsüba sentong ka ayongzüka liasü, kong EAC, Imkongnukla Ao-i tayongzüka o jembia liasü.

Veterinary Surgeon, Longleng, Dr. Aoyimsen Jamir ajanga nüburtem nung shi temürek agütsütsü asoshi ak/nashi metsür aser supplier nungi shimang alizükba sülen tepseta amshiba tesem kanga junga mürekmeja amshitsü indang jembia liasü.

Shi business inyaker tem nem shi belenba gari aser osettsüset balala amshiba densema shi

ayokba tesem mürekmeja amshitsü indang tesayuba agütsü.

Pai shi amshirtem dang pei temang mürekmeju mesüra aser kumdanga mera magira, parnoki amshiba shi nungi mesen aser tashidak balala menatsü lenmangtem lir ta tekumdangtsü ashi.

Medical Department nungi Epidemiologist Dr. Limasungle Imchen-i shi nung aliba 'zoonotic' aser 'parasitic' tashidak indang lemsatep aser kidang metsüba aser commercial atema amshiba mapang mürekmeju masüba mesüra shi junga masoba ajanga tashidak balala agi menepba indang rateta ashi.

Laisa shi amshiba mapang pei temang kanga junga mürekmeja alitsü aser tashidak balala nungi kumzüksü asoshi jelia mera agitsü indang shia liasü.

DIPR ajanga MIFF dangi nisung pongu yoktsü



Top (L-R): Chiam Shiu, Kikru Neikha, Supongnukshi Bottom (L-R): Jackto Wotsa, Thejanguzo Titus Pienyü

Dimapur, Aami/June 16 (TYO): 18th Mumbai International Film Festival, 2024 nung adentsü atema Department of Information & Public Relations ajanga state nungi film aser sendaktepa aliba wadang nungi nisung pongu shimteta lir.

Par pongu ya Nagaland tenüng nung iba Festival nung adentsü, koba Mumbai nung June 18-21, 2024 anogotem alitsü.

Parnok rongnung Chiam Shiu ya tang Assam nung aliba Dr Bhupen Hazarika Regional Govt. Film and Television Institute nung Applied Acting

tezüngdak lir. Kohima nungi Kikru Neikha ya actor, model aser content creator ka lir, shibai e-commerce company balala den lokteper inyaka arur.

Supongnukshi Pongener ya Dimapur nungi cinematographer ka lir aser pai photography aser filmmaking kanga jangrar.

Jackto Wotsa ya R&N (Reckless Films and New Life Studio) atema audio engineer ka lir. Pa ya Musika, Dimapur nunga mixing engineer ka lir.

Thejanguzo Titus Pienyü ya India TV nung video journalist ka ama inyaka liasü aser

Bollywood productions ana, Fugly aser Aayee Bala Ko Taal Tu nung cinematography indang second director ama inyaka liasü. Pa ya StillFilms Production nung co-founder ka lir, aser iba production house ya local artists tem den inyaker.

MIFF nung shilem agitsü ya Ministry of Information & Broadcasting kübok National Film Development Corporation of India (NFDC) aser Department of Information & Public Relations (DIPR) lungjemer inyakba ajanga lir.

Nagaland nung film aser sendaktepa aliba maparen indang nodal department ka ama DIPR yagi sempet aliba local nisungtem ajungketa parnok nem sapang tajung agütsütsü nükjidong lir.

Iba maparen yagi Department ajanga Nagaland indang film community ainba nung temulung agüja yaritepba ajiteter aser local filmmakers, actors aser industry professionals nem maongka balaka agütsür.

Mumbai International Film Festival nung shilem agidaksüba ajanga DIPR aser NFDC ajanga Nagaland indang sempet dangar nem ngudaksütsü aser tarutsü nung national aser international sapang nung shilem agitettsüsa renlokdaksütsü nükjidong lir.

MIFF nung shilem agitsü Yapangnaro jaoka lir



Nagaland nungi Yapangnaro Longkumer ya independent documentary filmmaker ka lir, aser June 15-21, 2024 anogotem Mumbai International Film Festival nung Docu-Film Bazaar nung shilem agitsü jaoka lir.

sentong lir aser iba sentong ya industry nung t a k o t e t nisungtem den sendaktepa parnok indang project nung shisatsü lemsatepa 'international buyers' bushiteta parnok indang film alima sapang tashi ajungkettsü nükjidong nung lir.

Longkumer-i Film Division, Mumbar atema documentary

Dimapur, Aami/June 16 (TYO): Nagaland nungi independent documentary filmmaker, Yapangnaro Longkumer ya June 15-21, 2024 anogotem agitsü aliba nüngtugu Mumbai International Film Festival (MIFF) indang mezüngbuba Documentary Film Bazaar nung shilem agitsü jaoka lir.

MIFF ajanga mezüngbuba Docu-Film Bazaar ya June 16-18, 2024 anogotem ayongzüksü

aika yanglua lir, koba film festival balala nung sayuogo. Lai Nagaland nung documentary, public service announcements aser sorkar indang film project balala direct süa lir.

Lar production house ajanga küm aika film aser media dak sendakba production aika awajema arur. Yapangnaro Longkumer ya tawa Film Association of Nagaland (FAN) indang tir shima lir.



June 16, 2024 nü New Delhi nung Union Home Minister Amit Shah leniba nung tongti ketdangsertem senden ka mena Jammu & Kashmir nung security tensa asadanga mapang tangokba noksa nung angur. Kasa noksa nung Jammu & Kashmir Lt. Governor, Manoj Sinha aser National Security Advisor, Ajit Doval nata angur.

NEET tatidang ochimashi atema opposition-i sorkar aitsür

New Delhi, Aami/June 16 (Agencies): National Eligibility-cum-Entrance Test (NEET) tatidang nung ochimashi liasü, ta tai tonglokja linük tesem ajaklen kaketshirtemi longkak aitba dak sendakba nung opposition lenirtemi sorkar aitsüdar.

May 5, 2024 nü kaketshir lakh 24-i NEET tatidang agüja liasü aser June 4 nü tatidang agiba results sangdong. Iba anogo nung Lok Sabha Elections osanga sangdonga liasü.

Ajisüaka iba tatidang nung ochimashi liasü ta tai tongloksür aser kaketshir 67-i score 720 nungi 720 ngutetba agi aika süngmanger.

Longkak aiter kaketshirtemi, exam centre nung mapang indokba atema grace marks agütsüba ajanga aikati marks tali angu, ta ashir.

Tang iba ken o ya Supreme Court matsüngdang benoka lir. Centre sorkari Supreme Court dang, candidate 1,563 nem grace marks agüja alibaji

agienogo, ta metetdaksü. Tamil Nadu nung DMK sorkaria, National Testing Agency (NTA)-i NEET akhümket tenüng menüksüogo ta ashiba den külemi Centre nung BJP-i aniba sorkari ola madoki dang toktsür aser sen aika aazükba coaching centres pusemer, ta aitsü.

Centre sorkari Supreme Court dang kaketshir 1,563 nem agüja aliba grace mark ji agienadokogo, ta ashibaji aija DMK-i, iba ken o ya Supreme Court nung mebenok asübo BJP sorkari yamaji meinyakla, ta ashi.

Tesüiba küm aika NEET nung ochimashi inyaker ajisüaka BJP sorkari iba atemaji kecha meinyaker, ta parnokisa aitsü.

Amongnü Delhi Health Minister aser AAP lenir, Saurabh Bharadwaj-ia NEET-UG tatidang nung ochimashi aliba atema tebilemsü akaba lemsatepba den külemi nüburtem dang tatidang tanaben

agishitsü asoshi kaketshirtemi akhangbaji pusemsüla, ta ayongzüük.

Bharadwaj-i, "Iba ya süoki ia agitsü ken o ka lir, kechiyong doctor akümsü teimla nung küm piyong renema kaketshir lakh 24-i MBBS tatidang agütsü. Tanübo iba tatidang nung ochimashi tulu liasü ta osangkakettem nung adoker. Item kaketshirtemi doctor akümsü atema anogo ka nung ghonda 18 tashi study süa liasü, anungji parnok melung raksago. Parnoki tatidang tanaben agishitsü akhanger. Parnoki akhangba tila kaji Centre-i agizüktsü asü?" ta asüngdang.

Taoba mapang HRD minister, Kapil Sibal-ia Supreme Court-i ketdangsertem shimteta iba ken o bushisüngdangtsüla, ta takhangba agütsü.

Ato kilonser Narendra Modi aija paisa, "Tatidang balala agiba inyakyim nung ochimashi lira Ato kilonseri ola madoki alibaji tim masü," ta metetdaksü.

Madhya Pradesh nung ki kar nung nashi shi anguba sülen ki 11 bendoktsü

New Delhi, June 16 (Agencies): Madhya Pradesh kübok Mandla nung sorkar li nung nisung 11-i asüba kitem nung ozüng alema nashi shi shishilembaba putetba sülen item ki bendoktsüogo.

Tribal nütsünga aika aliba tesem nung ya nashi tepsetba osang angazükba sülen ketdangsertemi ki aika bendoktsü, ta police-i metetdaksü.

Bhainwahi, Nainpur nung nashi tepsettsü atema yua lir, ta

osang angazükba sülen police-i iba tesemji mita oa liasü.

Mandla Superintendent of Police, Rajat Saklecha-i, "Police team ka iba tesem jagi yok aser onoki ki tesülenji nashi 150 sendaka angu. Temelung meleme nisung 11 meyong ki mita aoba mapang nung parnok indang refrigerators nung nashi shi angu aser takdang ka nung shiruru temo den teküp aser teret angu," ta metetdaksü.

"Yangji aliba sorkar

veterinary doctor kati itemji nashi shi lir ta jangjatsüogo. Onoki DNA tendangtsü atema nashishi samples Hyderabad-i yokogo. Tai tonglokja alir nisung 11 meyong kiji bendoktsüogo, kechiyong item kiji sorkar li nung asüba lir," ta SP-isa metetdaksü.

Nashishi anguba sülen FIR ka benok aser nisung ka puogo; tanünga nisung terji tang tebushidak, ta paisa metetdaksü.



June 16, 2024 nü New Delhi nung lenmang nung yokya-yokchirtem süngdong ka akhümbok nung anisüngzükdang tangokba noksa nung angur.

TDP-i LS speaker menden atema toktepra INDIA-i yaritsüa akok: Raut

Mumbai, June 16 (Agencies): Amongnü Shiv Sena (UBT) lenir, Sanjay Raut-i, NDA teloktep nung densema aliba Telugu Desam Party (TDP)-i Lok Sabha Speaker menden atema toktepra opposition INDIA teloktep nung aliba party ajaki TDP candidate yaritsü atema inyaksü, ta ashi.

Mumbai nung osangbenertem den jembidang Raut-i, Lok Sabha speaker election ji kanga tongtibang asütsü aser BJP-i iba mendenji ngura ibaji ajanga sorkar pusemba party tem- TDP, JD(U) aser Chirag Paswan o Jayant Chaudhary nungeri aniba party tem raksatsü, ta ashi.

"BJP-i parnok pusemertem ashioktsür, aser ibaji onoki ajangshia lir," ta Raut-i ashi.

"TDP-i candidate ka toktepdaktsüner ta onoki angazükter. Yamaji süra INDIA teloktep nung party temi iba atemaji jembitsü aser INDIA teloktep nung aliba party ajaki TDP yaritsü atema jembitsü," ta paisa metetdaksü.

Temzüng kübok deputy speaker mendenjibo opposition-i angutsüla, ta Rajya Sabha MP, Raut-isa metetdaksü.

Lok Sabha election sülen RSS lenirtem kari BJP indang jembiba otem dak sendakba nung tasüngdangba ka langzüdang Raut-i, RSS-i taoba mapang aibelen balala metongshitsü bilemra ibajibo junger, ta ashi.

June 7 nü Parliament Central hall nung National Democratic Alliance teloktep senden nung Ato kilonser Narendra Modi, NDA Parliamentary Party lenir, BJP Parliamentary Party nunga lenir aser Lok Sabha nunga BJP lenir shima liasü.

Raut-isa, "Modi ya NDA parliamentary senden nung lenir shima liasü; BJP parliamentary party senden nung masü," ta ashi. "BJP parliamentary party senden mamen. BJP parliamentary senden nung ibaji jembisa yamaji mesüi lila. Anungji Modi ya NDA parliamentary senden nung lenir shimba lir," ta pai ashi.



International Day of Yoga atongtsü joko mapang ana nung lia June 16, 2024 nü Mumbai nung Yoga atema o lemtepba sentong ka nung Padma Shri award angur arrshi küm 128, Swami Sivananda-i yoga aidang tangoknsa noksa nung angur. Kasa noksa nung film director Shubash Ghai aser yoga tesayur Swamiji Kapri nata angur.

Karnataka nung petrol jenjang atuba atema BJP-i Congress aitsür

Bengaluru/New Delhi, June 16 (Agencies): Karnataka nung petrol aser diesel jenjang atuba sülen BJP lenirtemi Congress sorkar aitsüogo.

Karnataka BJP Tir, BY Vijayendra-i Karnataka nung Siddaramaiah-i aniba Congress sorkar aija, totzü jenjang atuba atema BJP-i sashia longkak aitsü, ta metetdaksü.

Amongnü Karnataka nung Congress sorkari petrol litre shia nung sen 3 aser diesel litre shia nung sen 3.05 tuogo. Lok Sabha Election tembangba sülen totzü nung jenjang atuba atema Congress aija BJP lenir, Vijayendra-i, iba ya ajanga state nung sector ajak kongshitsü, ta ashi.

"Chief Minister Siddaramaiah-i Karnataka nung sentong tasen kecha magütsüteter, aser ibaji tamalen parnok tenangzükbatem ajanga lir. Lok Sabha elections sülen parnoki petrol nung sen 3 aser diesel nung sen 3.5 tuogo. Iba ya ajanga state nung lenla ajak kongshitsü," ta pai ashi.

Paisa, asüng (June 17) BJP-i state nung Congress sorkar anema longkak aitsü; jenjang majem tashi BJP-i mena malitsü, ta metetdaksü.

BJP lenir, CN Ashwath Narayan-ia, petrol jenjang atuba ajanga sensakertem kanga timtemtsü, ta ashi. "Tang tesüsa petrol nung sen 3 aser diesel nung sen 3.5 atuba ajanga sensakertemi timtem ajangshitsü. Congress ya mapang ajak nung nüburtem anemba party lir. Karnataka nung parnoki iba election (Lok Sabha) nung tamakok anguba sülen parnoki nüburtem ano taliba anemer. Jenjang atuba anema onoki longkak aitsü. Onoki mapang talangka longkak aitsü," ta paisa shisem.

Ano külen tanga osang ka nung Karnataka Chief Minister, Siddaramaiah-i, state nung saru ajema kümogo anungji totzü nung jenjang atuba ajanga public services agütsütettsü aser terenlok projects inyaktettsü, ta metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, JUNE (AAMI) 17, 2024

Yimtitem tajungba akümtsü

Mapang talangka Nagaland nung Municipal aser Town council election magiteti aruba sülen tan June ita 26 nü agitsü aser July nungibo Nagaland nung Municipal 3 aser Town council 36 nung yimten kümteta aotsü. Urban Local Bodies election magitetba agi Municipal aser Town council ya nübortemi shimtetba ketdangsertemi masü saka government nungi yokba ketdangsertemi dang pei town nung nungdak repranga anepalua aruogo. Atangji, Municipal asüyonga, town council asüyonga state government-i senotsü magütsüteter aser shishilembadak nungi küm nung khen saru saruba agibo ita sen-ang magütsüteter, anungji yimti yimdonga junga moukteti pei lima agi pei nümamedangtetsüsa lia arur. Iba ama mapang ka nung tang ULB election agiba yagi Nagaland nung yimtitem tereprangtsü kisung nunga topur junga akümtsü imlar. Tajung kaji, ULB election agiba sülenbo Municipal aser Town Council-tem dangi Delhi nungi terenlok mapatem inyaksü asoshi sen yoktsü, anungji urban tesemtem ajak nung tang dang nungibo kanga agia tajungba terenlok mapatem inyaktetsü. Atangji, terenlok mapa inyaksü asoshi nungdakbaji sen dangbo masü saka sen dang nungibo shisatsü (idea) aser tangatetba (commitment)-ang tenungdakba nungdaker. Aji oda, sen dang lira ajak inyakteter asübo tang asen akaba Nagaland yaa tang dang nungibo noklangben agi tajungba aser takarba süla. Tanü Nagaland nung yimtitem yimdonga den maktet akümba ya sen maliba kija agibo masü saka asenok lenir aser ketdangsertem dak asen lima renloktsü aser asen yimtitem tajungba kümdakja inyaksü shisatsü aser tangatetba peria maliba ajanga lir. Asenok asoshi tongtibang tangatetsü kaji, sen agi shisatsü angur masü saka shisatsü agidang senotsüa angutsü, anungji yimten, lokti aser arogo lenirtemji rongsen nung takar masü saka shisatsü nung takar nisung ka asütsü tim. Asenok tia ajung, yashi yakanü amato masü saka tanübo Municipal aser Town Council election nung tokteperitem ya shisatsü aser tangatetba aketba nisungtem teimba nokdaka angur. Iba denji ano candidate-tem rongnung tazung-tashir lanurtem aika dena angudang, asen lima yimtitem ya kopi melli tajungba küma yanglua aotsü teimla ka agütsür. Tanübo computer putu aser computer-sa asüyonga ano computer ajanga mapa ajak nisung melen inyaksüsa Artificial Intelligence (AI) amshiba putu lir. Iba ama putu ka nung asen among adena moudanger aser tangar den pi oshi agi pei bilemba sadema meshitetba nisungbo jangrayonga leniba khuret aser maongka agizüksü menungdaker. Ano, tajung kaji Municipal aser Town Council election nung yabo, assembly election amato masü, saka pei mepu (ward) nung telidak purtemang aier, anungji peisasa pei mepu nungdak meteta lir. Kasaji, nisung kati ketdang asütsüba mepu (ward) kaji mayimjemtsüla mesüra mereprangjemtsülabo masü, tila ka dang, anungji tzunglu tarudak nunga pei mepu nung motzü koma ayimer ta reprangaka senzütetsü. Iba amaji, janaona koma endoker, lenmang aser tzübo koda yanglua lir, tzü aser light komaka arur aser yimti topur jungdaktsütsü asoshi kechi sentongtem nungdaker ta asungdangtepa aser reprangtepa inyaksüsbaji teinyakner medenbo jangratemtsüka asütsü. Aji oda, election nung tapu-tapu nangzükyonga aser government nungi pei mepu aser pei yimti renloktsü atema senotsü yokyonga, ketdangsertemi mapa shitak inyakba pei mepusangertemi mengura, idangjisa mepusangertemi RTI ajanga senotsü yokba aser amshiba indang temetnubatem ajak asungtepa metetsü akoktsü. Tetezü, tanübo nübortemi dang pei temeten aser government inyakyim meteta inyakra, Municipal aser Town Council nung shimtetsangi dang masü saka MLA-i dena nübortem meyong nübortem dang miima naiya paisa kata magitettsü. Iba putu yimya inyakyim nung Nagaland nung yimtitema memenui tangar yimtitem mesüka topur junga yanglua aotsü imlar.

OLEMSABANG

Lokti longjema aser sünepa akümtsü atema ajak tila akümtsüla

~ L . Kika Pongener.

Asen mimchir ya lipokdang nungi kija aliba masü lokti aliba shilo ka lir. Lokti kaji kin-kidong telemsa aika meyokteper akümer. Atangji, loktiji nisung tapu balala meyokteper akümba lokti asünungji tetibo putepa malir, mapang kar nung, maparen kar nungbo kenbang-obang mapu, ken o ashishitepa mepetmesua adoker. Item tensa tia ajakji kodaser adoker ta bushidangra, aiben asenoki Tsüngrem sentong mangateti, asen mimchir shi mulongba aser taginuba nung telemtetba agir inyakdang, iba ama tensa tia ajurur. Tsüngremi Abraham kin jenti tebu kümdaktsütsü nangzük, saka Abraham dak nungi jakzüka rena aotsüsa jabaso maliasü. Anungji mimchir tsütsü nungibo, Abraham kin jenti tebu akümtsüji teimla mali asü. Yongji Abraham o kinungtsü nati tena sasa sentong ka atong aser kilitsür Hagar ajanga Ishmael aso. Aser Ishmael ajanga Abraham kin jenti tebu akümtsü ta bilem, saka aji Tsüngrem sentong masü liasü. Tsüngremi pai nangzükba kodanga meyzür, mapang tetemsu nung Isak aso. Ajisuaka, kodang Isak tain aküm, Ishmael o Isak na meputepi aküm aser tena meji Abraham'er kibong nung mepetmesu adok. Anungji Ishmael kidang nungi aritoktsüsa aküm. Aji oda, pei jabaso rongnung kabo kidang nungi aritoktsüsbaji Abraham asoshi kanga temelabo masü, iba nungji meshitetba timtem aika lir. Abraham o Sara nati Tsüngrem sentong matateti inyakba ajanga, Ishmael o Isak na tsükchitep tenzükdaktsü. Anungji Abraham'er atepzüng nung temenen tera ka tenzükba agi, pa dak jakzükba kin ana semchirtem tsungda tanü asen putu tashi rara manener...Aser tanüa Israel o Arab kintem tsungda raradagi, aser ibajagi alima kintem ajak tekolak menudaktsür aser 'United Nations Organisation' (UNO) dena tekolak menudaktsür.

Tesasatsüka, tanü asen lima nung loktiliba aika nung mepetmesu agi sunga lir. Tanü asen lokti aika nung ken o ashishitepba, mangatettepba, meputepba, item ajak ya kodaser adoker ta jungjunga bushidangra, aiben asenoki Tsüngrem sentong mangateti, asen mimchir shi mulongba agi lemteter inyakdang, khen-khenbo tamakoka angur aser tetsükdaktsüa ajurur. Lokti nung lennirtem-jia mimchir dang asünung, tetibo ken o telemtetba ajakbo shitak masütsü akok, mesura mapang kar nungbo metok-meperi aser tashimait inyaksema atar. Anungji lokti nung ken o lemtetba ajak khen kechi lemtet, aji tatempang ta mesui, tetsükdaktsü ajurura khen meyipa reprangshiyongjia tajungba dang asütsü. Kechi mapa sudir suaka, meyipa reprangshiba nungji aibelen kecha mali ama bilemer. Aji oda, kechi mapa sudir suaka, tanaben meyipa reprangshiba agi loktiji raksatsü melena telongjem-ang tali akangshira, ibajiang kanga agi tajungtiba asütsü. Abraham o Sara nati Tsüngrem sentong matateti shi mulongba mapa ka inyakba agi, par jabaso Ismael o Isak na tsükchitep adokdaktsüba ama...Aiben asen lokti nung asen taginuba nukjidong kar atongtsü arishidang, Tsüngrem sentong mangateti inyakhia atar, aser idangji lokti maparen kar nungpo tetsükdaktsü ajurur.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Mission mapa atema mission telok aikati Arogotem den longjemer



Taoba ita Thailand yimtiba, Bangkok nung alima nung mission lenirtem, missionary tem aser pastor tem senden amenba mapang tangokba noksa nung angur.

June 16, 2024: Alima nung Khristai tenyaba wadang longjemer inyaksü asoshi tawa Global South nung lenirtemi mission telok ka tentetogo.

Tawa Thailand yimtiba, Bangkok nung senden amenba mapang nung COALA telok tenteta liasü. COALA tetezü "Christ over Africa, Latin America and Asia" lir. Parnoki longjemer mission mapa inyaksü.

Bangkok nung amenba senden nungji linük 30 nungi missionary tem, mission lenirtem aser pastor tem parnok ajak senteper 38 aden. June ita nunga Korea World Mission Association-i ayongzüka parnok senden amentsü.

Bangkok nung amenba senden nungji Latin America nungi COMIBAM (Cooperación Misionera Iberoamericana) lenirtema densema liasü. Iba teloki national mission groups aser Latin American linüktem 25 nung network yanglua inyaker.

"Senden nung onoki Christendom model agi chichiba poly-centric mission akümba ajanga alima nung mission mapa tsütsü temelenshi tulu adoktsü atema o lemtepa liasü," ta COALA-i metetdaksü.

"Greetings to the Global Church of our Lord Jesus Christ, all mission movements & networks" omen nung ajemdaker COALA 2 senden nung alima nung Khristan yimsü Global South tsütsüleni meyipba indang jembiba den külemi alima nung missionary tem indang jembi; iba dak alia alima nung Arogo kübok telongjem alitsü aser Arogo den partnership nung missions mapa inyaksü atema jembi.

Parnokisa, "Aso 20buba nung alima nung Arogo kanga melenshiba kuli nguogo. Tang mezüing tanü putu nung Arogo anüolen tsütsülen nungi Majority World (MW: Africa, Asia, Latin America & MENA [Middle East aser North America]) dangi meyipogo. Tanübo alima nung Khristan nünsüing shilem asemsü nungi

shilem anabo (2/3rd) Global South nung lir," ta metetdaksü.

"Iba denji külemi anüolen nungi missionary tem yokba kanga ajema kümogo, aser iba tapok atemaji Majority World nungi missionary tem teimba-teimba yokba onoki nguogo. Ano linük karbo missionary tem yokba linüktem ta agizüktetogo. Iba dak alia akhidang missionary tem yokba linüktemi tamalen parnoki yariba linüktem nungi missionary tem meyipa angur," ta COALA-isa metetdaksü.

"Item kuli nung ajemdaker tanübo alima nung Arogotem aikati tanü asenoki polycentric missions putu ka nung alir ta bilemer, kechiyong tangbo mission mapaji tesem ajaklen inyaker. Item kuli ajanga alima nung anüolen aser MW Arogotem naprongla nung temelenshi adokba jangjar," ta parnokisa metetdaksü.

Parnokisa, "Mission nungji Tanela Temeshi tiyongtsü südaktsütsüla. Mission ji tanela temeshi tashi nem anidaksütsül. Yisu Khristai tuyuba ama (tatitshitsü- Luk 24:49; T. Mapa 1:4-5, 8) aser Tasen Lai nung tenyartem, talisa Tenyartem Mapa kaket nung shia aliba ama asenoki yokba missionary temji tanela temeshi nem anidaksütsüla aser Pa tashi ajanga inyaksüla. Tanela Temeshi ajanga mission inyakteter aser süngjang tangdaksür," ta metetdaksü.

"Missionary tem aser mission mapa nung inyakertemi kilir melungjang denner ajemalua aser Arogotem nung inyakertem akhümtsübüa inyaksüla. Parnoki pei shisaliok jenjang nung masü saka teti Tsüngrem dak dang metaloktsüla," ta parnoki benok.

Local Arogotem den tesendaktep yua aliba dak sendakba nung parnoki, "Akokba tashi missionary temi Kibuba yimli temelungjang nung yur local Arogotem den inyaksüla," ta benok.

"Missionary temi mapang ajak nung parnok inyakra

tesem nung aliba local Arogotem den amalitepa inyaksüla. Anungji missionary temi parnok yokba tesem nung tamangertem den tesendaktep yanglutsüla aser akokba tashi parnok yokba tesem nung Arogo lenirtem kübok tenzüksü atema melunga alitsüla," ta parnokisa metetdaksü.

"Missionary temi parnokji tetsütem ama masü saka nurse tem ama bilemtsüla. Tetezü parnoki local Arogotem nung lenirtem akhümtsübütsüla aser tongtibang telemteba ajak parnok nem dang agidaksütsüla," ta parnokisa metetdaksü.

"Khirsta atema kulisürtem tajungtibaji lisopur tamangertem aser local Arogotemji lir. Iba dak sendakba nung missionary temi lisopur tamangertem aser local Arogotem den sendaktepa aliba institutions nem Arogo aintsü atema inyadaksütsüla. Missionary tem atema teinyaksü tongtibangtibaji training agütsütsü aser lispour tamangertem den külemi atongsema inyaksü atema lir," ta parnokisa metetdaksü.

Senotsü teyari dak sendakba nung COALA-i, "Mission mapa nung kanga tebilemtsü tulu kaji sen lir. Sen ajanga temoatsü bener arutsütsü akok, saka sen ajangasa tarutsü nung takoksa-a tulu bener arutsütsü akok. Anungji onoki missionary tem dang aser missionary yokba tentetem dang kanga kümdanga inyaksü ajungshir. Local Khristan ka libaliro dang nungi asenok (missionary tem) libaliro 'standard' ji tajungba masütsüla mesüra tarutsü nung local Arogotemji timtemtsüsa sen aika indokba projects meinyaksüla," ta parnokisa lemtet.

Tatema parnokisa mission mapa longjemer inyaksü lemteta, "Khrista nung asenok longjemtsü asenok jatet (Yohan 17:11,21), aser ibaji Tsüngrem yimli atema inyaksü asoshi chichiba telongjem südaktsütsüla," ta metetdaksü.

ANOGO ABEN TSÜNGREM DEN

Tesendaktep Ozüing Masü


"Kechiyong Khrista Yisu nung taküm Tanela ozüing agi ni temenen aser tasüba ozüing nungi nüji kümdaktzür" (Rom 8:2)

Tanela nung jajabaji anema alitsü asoshi inyaksü agütsüba mapa dang nungi tali tesendaktep lir. Tatishitsü ka bilemdangdi. Na kibong akümdang kati ka nungdak ajak nung yaritepa tesendaktep junga ayutsü asoshi ozüing (rules) kar nung mangadaker tenzüksü akok. Saka küm ishika süir külen yanglua akaba ozüing kar nung melira, kati ka den o a mejembinütsü mesüra temeima memeimtepnütsü. Satiba nükrangdongji ozüing atena oa tesendaktep renloktsübaji lir.

Mesüra sarasadem indang bilemdangang. Nai tongmelang agi sarasademtsü angazüka lir. Tenüngsang agütsür, temenen nangzüker, tushir, mepishir. Saka na Khristan kümer (temulung meyiper) küm ishika dang süra aser ne sarasadem o iba dangi tarokba mesüra, nai sarasadem onükji zütoker. Sarasademji Tsüngrem den sendaktepba aliba oshi ka lir. Kasaji Tanela agi jajabaji Tanela den tesendaktep lir, koba agi tajung tamajung bentettsür.

Oba, kü taküm Ne den tesendaktep aliba asoshi Ne tenüing asanger.

Franklin Graham-i Birmingham nung God Loves Tour tenzük



June 15, 2024 aonung Birmingham nung sayutsüingir, Franklin Graham-i Tsüngrem O jembidang tangokba noksa nung angur.

June 16, 2024: Honibar (June 15, 2024) aonung sayutsüingir, Franklin Graham-i sayutsüingiba angatsü atema UK aser tesem balala nungi nisung 8,000 dak tema Birmingham nung adenshia liasü.

Küm 40 tejaklen Franklin tebu aser nungtugu sayutsüingir, asür Billy Graham-i anasa aliba Villa Park nung sayutsüingiba sülen tang mezüing Franklin-i Midlands nung sayutsüingir.

Honibar aonung Birmingham Resorts World Arena nung lokti tulu den jembidang Franklin Graham-i, "Yisu Khrista masü. Pa taküm lir aser taonunga Pa asenok den yangi lir," ta ashi.

God Loves You tour atema Franklin Graham UK-i tanaben aru. June 22 aonunga pai Glasgow nung sayutsüingitsü.

Tebu Billy Graham-i UK nung aiben sayutsüingiba bilemteta Franklin Graham-i, "Ni pa menungrar aser ni iba linük semdangba mapang shia ni pa menungrar, kechiyong pai iba linük kanga meima liasü aser pai iba linük nung aliba nüburtem

meima liasü," ta ashi. 2020 küm Franklin Graham-i UK nung Birmingham densema yimti 8 semdangtsü sentong yanglua liasü, ajisüaka sentong agitsü tesem teneti tezüingzüktep raksaba aser parnok anema ken o benoka aliba ajanga item sentong magiteti liasü.

Billy Graham Evangelistic Association (BGEA)-i iba ken o nung takok angu, aser sentong agitsü aliba tesem tenet anema temerenshi agütsüba sülen item sentong agitet.

Honibar aonung Graham-i Luk tapu 19 nung ajemdaker sayutsüingia liasü. Iba lai nung Zakaria-i tekümtet anguba otsü shia lir.

God Loves You tour ya UK nung Arogo 500 dak temai nungiter. Honibar aonung osangtajung kentener Michael W Smith aser taoba mapang Hillsong nung lenir, Taya nati tekülem aser tetushi ania liasü. Tan hopta Graham, Glasgow-i aotsü aser 2025 küm London nunga God Loves You Tour agitsü.

AO OSHI ANGAZÜKDAK: TANÜ ANGAZÜKTSÜBA OJANG



Süzü

(n) sü tezü (mithun horns)

* Süzü teindang aser tesütep nung aren lir ta takzür.

Süzüngzü

(n) süzüng atangba süngzü (vine of sword bean)

* Süzüngzü agi süpong ka sentaka ayu.

OLONG PAITEP # 6820

15x15 crossword grid with numbers 1-19 indicating starting positions.

TIPIEN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6819 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzüik, 11. Teronem, 12. Sempa, 13. Jahaz.

NAI-A YA METETTER MA



Madhya Pradesh kübok Indore nung taküm July ita Guinness World Record ka yanglutsü sentong lir. Reoti Range nung anogo ka nung 11 million saplings atemba ajanga iba otsü yanglutsü ta Cabinet minister Kailash Vijayvargiya-i metetdaksüogo. Iba mapatong kübok Indore kübok municipal telongtet nung 20 lakh saplings atemtsü aser iba atema Indore Municipal Corporation (IMC)-i 15 lakh saplings aser Indore Development Authority (IDA)-i 500,000 saplings agütsütsü.

Iba maparen atema anogoshia ali ongken 200,000 tashi atutsü atema earthmoving machines bener arudar aser Jhabua o Khandwa amala tesem nungi saplings bener aruba den anameta district tem nungi nübo meshitsü ta Minister Vijayvargiya-i MP Shankar Lalwani, mayor Pushyamitra Bhargav aser local MLA tem lia metetdaksü.

Bishnupur district nung nisung telok kati truck gari 2 rongdoktsü



Imphal, June 16, 2024 (Agencies): Bishnupur district kübok Tronglaobi Awang Leikai anasa nisung telok kati apu yanglutsü atema oset bener aoba truck gari ana rogdoktsüogo. Truck gari pezü nung osettem bener Churachandpur-i aodang Tronglaobi tesem nung nisung telok kati sot. Idakji parnoki mi senoktsüdang gari ka rongdok, ka tera rongsa saka anabo state aser central security

forces ajanga kümzüik. Sekmai nung khu abenba sülen Singhat-i aodang lendong ajuru ta truck driver kati ashi. National Highway 102-B Churachandpur-Tuivai Road nung apu yangluba nung amshitsü osettem bener aodang len tom nung sot. Tronglaobi Awang Leikai nung truck garitem anendaktsüba sülen asü dangnya asü dang Churachandpur-i aoe ta langzü.

Idangji nisung telok ka adenshi aser parnoki garitem nung mi senoktsü. Iba osang angashili Bishnupur police aser central forces-i tesem tonga ao aser tenük amdaktsüba mokozü khatoka nisungtem senshidaktsü. Truck garitem nung mi senoktsüba enseptsü merang saka tensa mesüngjemteti lia Rapid Action Force (RAF) pur arua azüoktet.

Manipur nung kiralongrartem yarir ka Guwahati nung apu

Guwahati, June 16, 2024 (Agencies): Guwahati nung Sanjeev Kumar Mishra ta ser nisung ka Special Task Force (STF)-i puogo. Iba nisung yagi Manipur nung kiralongrar teloktem den yaritap ta tai tonglokja lir. Police-i drone components kar apuba sülen Mishra apu. Ozü ng agi noktanga aliba teloktem nem

advanced technology agütsüba maparen makdoktsü atema bushisüngdanga arudang STF-i pa apu. June 14 nü Guwahati nung Manipur nung Khaigoulen Kipgen apu. Pa ket nung drone assembly osettem bona liasü aser iba ya Manipur nung ozü ng agi noktanga aliba teloktemi kanga amshir.

"STF-i bushitepa arudang Mishra aser tangartemi kiralongrar teloktem nem drone technology agütsü" ta police headquarters sangdong ka nung ashi. Indian Penal Code nung 121 aser Unlawful Activities (Prevention) Act, 1967 kübok section balala kübok Mishra dak tai tongloktsüogo.

Arunachal kübok Tirap nung NSCN (IM) zü ngsem 2 apu



Dibrugarh, June 16, 2024 (Agencies): Arunachal Pradesh kübok Tirap district nung Assam Rifles sepaitemi NSCN (IM) zü ngsem ana puogo. Tena ya Lt. Khunliam Sumpa aser Cpl. Jenlong Sopong (Jenlong Wakthom) na ta jangjaogo. Tirap District nung tawa

General aser State Assembly elections agidang tenati Khonsa Town nung tashiyim agi sen sarua senzü. Osang tejangja ka angazükba sülen Assam Rifles Khonsa Battalion sepaitemi tena ket nungi 9mm pistol ka aser mobile phones 4 ngutetogo. Bodbarnü Assam kübok

Tinsukia nunga National Socialist Council of Nagaland-Khaplang (NSCN-K) den yariteper nisung ana puogo. Iba mapang tena ket nung Rs 12 lakh bona lia apu. NSCN over-ground workers (OGWs) kar senzüba osang sangoktsüba sülen sepaitemi Tinsukia kübok Tikok yimtsü ng tena apu.

Israel-i Gaza lenmang nung mitkar inyakyim anena atatsü sangdong

Tel Aviv, Aami/June 16 (Agencies): Humanitarian aid tali airdaktsüsü mechi Gaza south tsütsü lenmang anasa anogoshi mitkar inyaksangshi anena atatsü, ta Israel mitkar ashir, saka ceasefire malitsü aser Rafah nung maneni amaksü ashi.

Rara anena ataba maparen ya Honibarnü nungi tenzük ta ashir aser iba mapang ya anepdang 8:00 ako nungi nikongdang 7:00 ako tashi tarutsü nung sangdong ka magütsü tashi alitsü.

Iba ya Israel den arütsüa aliba Kerem Shalom crossing nungi north tsütsüi aoba lenmang nung alitsü.

US densema tembar linük temi Israel dang Gaza nung nisung meimchir tim atemba tamajungba mekumdaktsüi nokdangtsü ajungshia arur.

UN aser international organizations den iba dak sendakba ken o jembiba sülen Deobarnü iba osang ya sangdonger, ta Israel Defense Forces (IDF) ajanga ashir.

Humanitarian pause lenmang ya Gaza south tsütsü Kerem Shalom crossing nungi Salah al-Din Road - main highway - tashi aser iba sülen north tsütsü Khan Younis yimti anasa European Hospital tashi lir.

IDF ajanga social media X nung sangdong ka nung, Gaza Strip south tsütsü ceasefire mali aser Rahaf nung maneni raratsü akok ta ashi.

Gaza nung teyari agütsüba nung yariteper ActionAid indang odongtar kati osangbener dang ashiba agi, rara anena ataba ajanga teyari oset bener otetsü saka senzusempongsü aser

osetsüset belenshitsu atema osang tali tejangja nungdaker. "Khen atema anena atatsüba nungya onok tang tashi mangmanger, komaser teyari osettem ya Gaza Strip telungi bener aitsüba kisung masü saka yangji nungdaka aliba civilian tem nem lendong majurui lema agütsüsü tebilemdangtsü lir," ta Ziad Issa-i ashi.

Hopta ishika Kerem Shalom nungi Gaza-i aitsü merangba aid convoys dak amakba Action-Aid ajanga nguogo, ta pai ashi.

Mapang telatet rara anena atatsü sentong ya mesangdong tashi Israel Ato Kilonser Benjamin Netanyahu mesüra Defence Minister Yoav Gallant-i memeteti liasü, ta Israel media ajanga ashir.

Deobarnü iba osang angazükba sülen ato kilonser-i pa indang military secretary dang iba sentong ya majung ta ashi.

IDF indang policy nung temelenshiba mali aser sentong yanglua aliba ama Rafah nung nung raratsü ta Netanyahu-i ashi ta ashir.

Israel indang far-right National Security Minister Itamar Ben Gvir-i rara anena atatsü telemtetba ya tamachi aser temenen nisung temi agi ta ashi.

Ita ka tekaldang Israel sepaitem Rafah-i aiba sülen nisung meyirijang aika iba yimti nungi jenogo, aser Egypt den Rafah crossing nung Gaza tsütsü amokbanga yangji alir aika ainshitsü totuyuba agütsü.

Iba sülen mapang ya teyari bener aitba tesem tongti ka ta züngshiba crossing ya shibanga lir.

Hamas telok asoshi tesem tatembangba samatsüsü mechi Rafah amaksü nungdaker ta Israel-i ashir.

International agency temi Gaza nung nisung meimchir kanga kangshiteper ta ashi aser teyari oset bener yoktsü ajungshia arur.

Bodhbarnü World Health Organization Director-General Tedros Adhanom Ghebreyesus-i Gaza indang nütsüng yongsük aika pok masüng ayawara ama tensa nung lir ta shia liasü.

Totzü maden Gaza telungi anogoshi humanitarian aid bener trucks 97 shi ayir, ta OCHA ta ajanga UN humanitarian office ajanga May ita shia liasü. April ita 169 liasü aser March ita 139 liasü.

October 7 nü iba rara metenzükdang totzü densema teyari oset bener trucks 500 shi anogoshi Gaza-i yia liasü.

May 7 nungibo private sector nungi Kerem Shalom crossing alema teyari oset bener aiba metakzüteter, ta OCHA-i ashi.

Rafah kübok Tal al-Sultan neighbourhood nung Honibarnü operation agiba mapang Israel sepai ti pokset, ta IDF ajanga sangdong ka nung ashi.

Hamas-ia armoured vehicle nung rocket khaloktsü ta ashir.

Netanyahu-i Hamas anema maneni raratsü nangzuka lir aser Gaza nung Israel asoshi tetsübotsü kecha mali makum tashi aser pua alirtem ajak mechiok tashi raratsü ta ashir.

October 7 nü iba rara tenzüker Gaza Strip nung Palestine nung nisung 37,000 dak tema tepsetogo ta Hamas meyong health ministry ajanga ashir.

SÜR KÜM KA AJUNGBA BILEMTETER

Onoki teti meima aliba Asür Nungsangoba Jamir (June 17, 2023)



Nai onok yutsür orr küm ka jungogo. Na takum junga litetba atema onoki Tsüngrem dang pelar. Tzükum külenji asenok tanaben majuruteper tashi, anogoshi na onok mulungjang nung alitsü.

- Temeim kinungtsü, chirnur, anük-apang aser semchirtem.

LAND FOR SALE

1. COMMERCIAL SITE NUILAND - Highway Touched (a) 12 pura (Dry Land) - Rs. 280 per Sqft. (b) 3 pura - Rs. 135 per Sqft.
2. 10 Bighas (1 Fishery Pond) Near Kuhuboto Town - Rs. 30 Per Sqft. (Slightly Negotiable) CONTACT NO: 9863826159



SANGDONGER

1. Project - "Transmission System for North Eastern Region Strengthening Scheme-III" kübok Proposed DOCO to 31-03-2024 for Transmission Asset nungi Transmission Tariff yanglutsü atema regulation-86 of CERC (Conduct of Business) Regulations 1999 aser CERC (Terms and Conditions of Tariff) Regulations' 2019 temelaba.
2. Tekalen shia aliba Transmission system nung teyari angirtem yamai alitsü: (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board
3. Tariff tejangja:

Name of the Asset	Asset-1
Schedule DOCO (FR)	23.12.2017
DOCO (Actual)	16.12.2023
Estimated Completion Cost (Rs in Lakhs)	6131.36
Tariff for year 2019-24 (Rs in Lakhs)	
2019-20	-
2020-21	-
2021-22	-
2022-23	-
2023-24	313.27

4. Tariff jangjatsü atema application copy ka applicant indang website www.powergrid.in nung inokja lir.

5. Application nung aliba tariff determination atema proposals agütsüba nung temetongshitsü aser temelenshitsu lira, teyari agirtem densema nisung mashi kati Secretary, Central Electricity Regulatory Commission, 3rd & 4th floor, Chandralok Building, Janpath, New Delhi - 110 001 (mesüra Commission indang office aliba danga address) nem corporate office indang address nung applicant indang copy ka dener iba sangdong adoker anogo 30 tsüngta agütsüsü.

Place: Gurugram Date: 11.06.2024 Sd/ General Manager (Commercial)

POWER GRID CORPORATION OF INDIA LIMITED

(A Government of India Enterprise)
Registered Office: B-9, Qutab Institutional Area, Katwaria Sarai, New Delhi - 110 016
Corporate Office: Saudamini, Plot No. 2, Sector-29, Gurugram, Haryana - 122 001
Website: www.powergrid.in CIN : L40101DL1989GOI038121

A MAHARATNA PSU

Sweden aser Iran na tepuokdak alirtem melentep



Stockholm, Aami/June 16 (Agencies): Sweden aser Iran na Honibarnü tepuokertem melentepba sentong agiogo, ta ketdangsurtemi metetdaksü. Sweden-i, taoba mapang Iran nung ketdangsur ka chiok, shiba 1980s mapang nisung aika tepsetba nung shilem agiba atema aija liasü. Iran-ia Sweden nung ana chiokogo.

melentepba sentong agiogo, ta linük ana indang foreign ministry-i külem sangdong ka ajanga metetdaksü. "Oman-i jenjang tapet agiba ajanga linük ana pronglai tepyokertem tangatetep nung chioktsü mulungtepogo aser tepuokdak nungi chiokertem Tehran aser Stockholm nungi yokogo," ta kasa sangdong ajanga metetdaksü.

nung ketdangsur Hamid Noury chiokogo, shiba 1998 küm yimden yimsüsüba tsütsü Iran nung tepuokertem aika tepsetba nung shilem agiba atema aija liasü. Iran indang official IRNA news agency-i Noury, Tehran indang Mehrabad airport tonga aruba video ka sayuogo, kong pa par kinungertemi agizüka liasü. Kasa mapang nung Sweden

Ato Kilonser Ulf Kristersson-i, Sweden nung Johan Floderus aser Saeed Azizi na tayimtsü ka nung mener Sweden-i arudar ta ashi. Tena ya Iran nung tepuokdak yua liasü.

Arishi küm 63 tain Noury ya 2019 küm Stockholm airport nung apu aser pa Karaj, Iran, nung 1988 Gohardasht tepuokdak yimden yimsüsüba tsütsü tepuokdak yua alirtem tepsetba aser reshikangshiba atema aija taküm tepeyong tepuokdak ayutsü atema obendang agüja liasü. Iba taitüsüba ya pai magizüki liasü.

Iran indang foreign ministry-i local media nung sangdong ka ajanga Noury ya hostage ka ta ashiba den pa ya Sweden nung okadak kati ozüng alema telemtetba agiba ajanga tepuokdak yua liasü.

Noury-isa, pa indang ken o ya kanga tebenja ta ashi. "Tsüngremia Hamid Noury mechioktetsü ta ashi saka

chiokogo," ta pai osangbenertem dang ashi.

Iran indang Islamic Republic sorkar anema telok National Council of Resistance of Iran-i ashiba agi, Sweden-i parnok blackmail aser hostage pua bener aoba tasa nem kokdaksüogo aser iba ajanga Tehran tali ajungmesotsü.

European Union employee Floderus ya 2022 küm Iran nung apu. Pa ya Israel atema itangiter mapa inyakba atema apu, koba Iran nung tasüba agi merenshitsu aibelen ka lir.

Swedish-Iranian dual national Saeed Azizi-a 2023 küm November ita Iran nung apu. Sweden-i ashiba agi, pa ya tim mesüi apu.

European Commission tir Ursula von der Leyen-i, Sweden nung ana chiokba pelashishia agizükogo, aser tena chiokdaksütsü atema jenjang tapet agiba atema Sweden sorkar nem tenüngsang agüja liasü.

Euro 2024: Italy-i goal 2-1 agi Albania kokogo

Aami/June 16, 2024 (Agencies): Germany nung tang asaya aliba European Championship nung Honibarnü Italy-i goal 2-1 agi Albania kokogo. Asaya nung parnok mezüing goal achi, ajisiüaka meyipa tur parnoki asaya akok.

Dortmund nung asayaba mapang Albania nungi asayar Nedim Bajrami-i mezüingbuba goal ya second 23 nung idakja iba asayamung nung goal takaratiba indaktsüba otsü tasen ka yanglu. Taoba mapang 2004 küm Russia nung asayar Dmitri Kirichenko-i second 67 nung goal ka idakja Euro nung goal takaratiba idaktsüba otsü tasen ka yanglur liasü.

Ajisiüaka iba goal achiba ajanga Italy pur tezüdanga melei meranga asaya aser minute 11buba nung Alessandro Bastoni-i goal ka idakja goal kasasa aküm. Iba sülen Nicolo Barella-i parnok atema tanabuba goal idakja liasü.

Tanabuba goal idaktsüba sülen Luciano Spalletti-i aniba team yagi tajungba asaya ao, saka parnoki goal idaktsütsü maongka angubatem magitetba ajanga parnok asaya tatemlenbo Albania nem kanga nongshidakja liasü.

Italy team ya kasüka nungbo tanga team temi kanga junga memetetba team ka lir. Iba asayamung tesüsabuba koker aliba team ya taoba World Cup ana tashi atema qualify mesüiteti aruogo.

Küm asem tejakdang Euro asayaba mapang asayaba asayar pongu dang asaya tetenzük nungi asaya liasü aser team nung asayar tasentem timba lir kong, linük tenüing nungi tang agi tasembenbubaang

asayaba asayar Bologna centre-back Riccardo Calafiori nung amala asayartem densema lir.

Honibarnüsa Berlin nung Group B asaya tanga ka nung Spain-i goal 3-0 agi Croatia kokogo. Iba asaya nung Alvaro Morata, Fabian Ruiz aser Dani Carvajal nungeri Spain atema goal kaka idakja liasü.

Kasa mapang nung iba asaya nung Spain nung asayar

Lamine Yamal, iba asayamung nung asayaba asayartem rongnung tanobusang kümogo.

Asaya nung mezüingbuba goal ya Morata-i minute 29buba nung ikdaksü, koba pa asoshi Euro nung goal tenetbuba liasü. Iba goal idaktsüba sülen pa ya Alan Shearer aser Antoine Griezmann na den külemi iba asayamung nung goal timtiba idaktsüba asayartem rongnung tasembuba jenjang nung lir.

Dates	Kick off	Home/Away	
Friday 14 June 2024	8.00PM	Germany v Scotland	Group A
Saturday 15 June 2024	2.00PM	Hungary v Switzerland	Group A
Saturday 15 June 2024	5.00PM	Spain v Croatia	Group B
Saturday 15 June 2024	8.00PM	Italy v Albania	Group B
Sunday 16 June 2024	2.00PM	Poland v Netherlands	Group D
Sunday 16 June 2024	5.00PM	Slovenia v Denmark	Group C
Sunday 16 June 2024	8.00PM	Serbia v England	Group C
Monday 17 June 2024	2.00PM	Romania v Ukraine	Group E
Monday 17 June 2024	5.00PM	Belgium v Slovakia	Group E
Monday 17 June 2024	8.00PM	Austria v France	Group D
Tuesday 18 June 2024	5.00PM	Turkey v Georgia	Group D
Tuesday 18 June 2024	8.00PM	Portugal v Czech Republic	Group F
Wednesday 19 June 2024	2.00PM	Croatia v Albania	Group B
Wednesday 19 June 2024	5.00PM	Germany v Hungary	Group A
Wednesday 19 June 2024	8.00PM	Scotland v Switzerland	Group A
Thursday 20 June 2024	2.00PM	Slovenia v Serbia	Group C
Thursday 20 June 2024	5.00PM	Denmark v England	Group C
Thursday 20 June 2024	8.00PM	Spain v Italy	Group B
Friday 21 June 2024	2.00PM	Slovakia v Ukraine	Group E
Friday 21 June 2024	5.00PM	Poland v Austria	Group D
Friday 21 June 2024	8.00PM	Netherland v France	Group D
Saturday 22 June 2024	2.00PM	Georgia v Czech Republic	Group F
Saturday 22 June 2024	5.00PM	Turkey v Portugal	Group F
Saturday 22 June 2024	8.00PM	Belgium v Romania	Group E
Sunday 23 June 2024	8.00PM	Scotland v Hungary	Group A
Sunday 23 June 2024	8.00pm	Switzerland v Germany	Group A
Monday 24 June 2024	8.00PM	Albania v Spain	Group B
Monday 24 June 2024	8.00PM	Croatia v Italy	Group B
Tuesday 25 June 2024	5.00PM	France v Poland	Group D
Tuesday 25 June 2024	5.00PM	Netherlands v Austria	Group D
Tuesday 25 June 2024	8.00PM	Denmark v Serbia	Group C
Tuesday 25 June 2024	8.00PM	England v Slovenia	Group C
Wednesday 26 June 2024	5.00PM	Slovakia v Romania	Group E
Wednesday 26 June 2024	5.00PM	Ukraine v Belgium	Group E
Wednesday 26 June 2024	8.00PM	Czech Republic v Turkey	Group F
Wednesday 26 June 2024	8.00PM	Georgia v Portugal	Group F

Brighton Manager mapa inyaksü Fabian Hurzeler shimogo

Aami/June 16, 2024 (Agencies): English Premier League club Brighton-i Honibarnü sangdong ka ajanga arishi küm 31 tain Fabian Hurzeler parnok indang coach asütsü shimba sangdongba sülen pa ya English Premier League club indang full-time manager tanobusang kümogo.

Hurzeler, shibai lenisüba nung taoba season St Pauli pur Germany nung Bundesliga second division title bena liasü, pa den 2027 küm tashi atema tenangzüktepba yangluogo.

Texas nung asosang Hurzeler lenisüba nung Brighton pur asayatsü, kong asayar James Milner, 38, Danny Welbeck, 33, aser Lewis Dunk, 32 nung pa dang nungi tambu lir.

Ajisiüaka Brighton mendenbuba Tony Bloom-i ashiba agi, Hurzeler-i St Pauli pur German top-flight tonga aniba mapang mapa tajung inyaktetogo aser iba ajanga pa ya Roberto De Zerbi

melentsüpurtem rongnung ajak dang tajungba liasü.

Brighton pur July ita pre-season atema renemshi metenzük tsüingda Hurzeler work permit anguba sülen pa mapa tasenba tenzüksü.

"Head coach ka shimtsü atema nübu bushiba mapang nungi shimba tashi nung Fabian ya tangar dang nungi alaka balaka liasü, aser taoba ita 18 tsüingda pai St Pauli nung mapa kechi inyaktetogo, iba yagi onok atsüa arua liasü," ta Bloom-i ashi.

"Pai asayadaktsüba yimya ya onok Brighton and Hove Albion team asayadaktsünüba den mesükteper aser onok pusemertemia iba ya pelashishia agizüksü aser jangra ademtsü ta temulung lema bilemer.

"Fabian German federation kübok jenjang balala nung inyakogo aser taruba season Fabian den inyaksü onok kanga yongya atar," ta pai ashi.

Hurzeler, shiba mezüing 2016 küm coach mapa inyaka liasü, pai, "Brighton and Hove Albion coach tasenba akümba atema ni kanga pelar," ta ashi.

"Club puti otsü khenyongi balaka aser tarutsü atema nukjidong tajung lir, anungji ni iba project nung shilem agitsü yongya atar," ta paisa ashi.

St Pauli sporting director Andreas Bornemann-i ashiba agi, Hurzeler aoba atema jashir, saka pai Premier League nung inyaksü tejangraba aliba ya club-i akümstübur.

"Fabian-i St.Pauli nung assistant aser head coach ama kanga junga inyakogo," ta Bornemann-i ashi.

Ryan Mason, arishi küm 29 tain asüdang 2021 küm Tottenham indang interim coach aküm aser pa ya Premier League team ka aniba coach rongnung tanobusang aküm. Ajisiüaka Hurzeler ya full-time coach rongnung tanobusang asütsü.

Andy Murray Olympics atema British team nung züngoksemogo

Aami/June 16, 2024 (Agencies): Andy Murray Deobarnü Paris Olympics nung British team nung kija asayar pezü rongnung ka ama züngoksemba sangdogogo.

Murray, shibai pa taküm küm tatemlen asaya nungi anentsü ta sangdongogo, pa kija asaya nung ranking (97) ajema liaka taoba mapang Grand Slam koker alir ka aser Olympics nung gold medal ngur aliba asayar ka asüba ajanga ITF-i French Open nung asayatsü atema maongka agüja liasü.

Team GB-isa Brehostibarnü sangdong ka ajanga 2021 US Open champion Emma Raducanu-a züngoksemtsü ta ashi, saka la yirur mapang talangka masayai lir tangang

asaya tenzükter asünung taruba hopta ishika tsüingda surface aika melenshia asayatsü aliba ajanga iba maongka magitsü telemtetba agia liasü.

Murray, shibai 2012 küm London Olympics aser 2016 küm Rio Olympics asayaba mapang gold medal ngua liasü, pa kija asaya atema Jack Draper, Cameron Norrie aser Dan Evans nung den züngoksemogo aser tetsür kija asaya nung Katie Boulter kija asütsü.

Joe Salisbury aser Neal Skupski na tebur tarep asaya nung GB team nungi asayatsü aser Murray o Evans nata iba tetoktepba atema nominate süogo, ajisiüaka iba atema ITF-i telemtetba agitsü, shirnoki iba asayamung achaayanger.

Smriti Mandhana-i international asaya nung run 7000 yangluogo



Aami/June 16, 2024 (Agencies): India tetsür cricket team nung opener Smriti Mandhana-i, Deobarnü Chinnaswamy Stadium, Bengaluru nung South Africa den mezüingbuba ODI asayaba mapang alizüing tasen ka tongteta international cricket asaya nung run 7000 dak tema yangluogo.

Iba alizüing tongtetba sülen la ya India tsürtem rongnungi run 7000 adena yangluba tanabuba asayar kümogo. India tsürtem rongnungi taoba captain Mithali Raj-i la indang career tepeyong nung run 10,868 yanglua liasü.

IANS-i ashiba agi, tang team captain Harmanpreet Kaur-ia Mandhana tera agi dang memenepi lir, kechiyong laia tang tashi nung run 6,870 bo yangluatokogo aser iba ajanga India tetsürtem nung asayar tajung aika aliba sayur.

Asaya nung Mandhana-i la

sempet tajung sayua ball 127 nung run 117 yanglua liasü, kong four 12 aser six ka densema liasü. Lai tang mezüingbuba kidang asayaba mapang century ka yangluogo aser South Africa den asayaba mapang tanabuba century yangluogo.

Lai ODI century trokbuba yangluba mapang Deepti Sharma aser Pooja Vatrakar na den longjemer kanga junga asaya India team-i run 200 dak tema yangluba nung teyari agüja liasü.

Temetetsü kaji Deepti Sharma-ia iba asaya nung run 37 yanglu aser iba ajanga ODI asaya nung run 2000 dak tema yanglua alizüing tasen ka tongtetogo. La atema iba asaya ya international asaya 200buba liasü.

India aser South Africa na ODI asem asayatsü asoshi ayongzuka Deobarnü nungi asaya tenzükogo.

BILEMDANGANG
 "Tangar den medemdangba ajanga tepela samadaktsür."